



República Democrática de Timor-Leste  
**Ministério do Plano e Finanças**  
**Gabinete do Ministro**



## **LANSAMENTU INTERLIGASAUN SISTEMA GRP no R-TiMOR**

Díli, 8 febreiru 2018

### **Diskursu Ministru Planu no Finansas, Rui A. Gomes**

Ha'u hakarak hatoo ha'u nia saudasoes kalorozas ba Na'i Primeiru-Ministru, Dr. Mari Bim Amude Alkatiri no Na'i Governador Banku Sentral, Dr. Abrão de Vasconcelos no ba konvidadus *de honra* tomak Ministériu Planu no Finansas nian. Lokraik di'ak.

Ita nian prezensa iha serimónia lansamentu ida ne'e atu sai testemuña ba interligasaun diretu entre sistema rua, GRP (*Government Resource Planning*) husi Ministériu Planu no Finansas no sistema R-TiMOR husi Banku Sentral. *R* signifika *real time*. Na'in ba *R-TiMOR* mak Banku Sentral hahú kedas husi fulan Abril tinan 2015.

Banku Komersial sira hotu ne'ebé ohin representa iha fatin ida ne'e nu'udar partisipante diretu iha sistema R-TiMOR ida ne'e.

Sistema rua ne'e atu lao ejije esforsu makas no tékniku tebes. No esforsu atu halo interligasaun entre sistema *FreeBalance GRP* ho *R-TiMOR* hahú iha fulan Maiu tinan 2015.

Ba ida ne'e, ha'u hakarak hatoo ha'u nia agradesimentu ba ekipa husi Ministériu Planu no Finansas ne'ebé la hatene kolen atu nune'e ohin ligasaun sistema rua ne'e bele akontese dunik. Husi fatin ida ne'e mós ha'u hakarak agradease ekipa husi Banku Sentral ne'ebé fó apoiu ba Ministériu ida ne'e durante faze preparasaun.

Ba susesu lansamentu interligasaun sistema rua ne'e ha'u tenke fó rekoñesimentu ba empenñamentu tomak husi Vise-Ministra Planu no Finansas, Dra. Sara Lobo Brites ne'ebé halo serbisu husi parte rua kedas, husi Ministériu rasik no husi parte Banku Sentral wainhira sei kaer knaar nu'udar Vise-Governadora Banku Sentral.

Hahú ohin ba oin, prosesamentu pagamentu sira husi governu ba fornecedor bens no servisu automatizadu ona. Ho automatizasaun interligasaun ida ne'e signifika katak osan sei tama iha fornecedor nia konta iha tempu ne'ebé badak tebes—karik iha minutu balu nia laran—wainhira pagamentu ne'e hetan ona aprovasaun iha sistema GRP. Pagamentus sira ne'e inklue selu saláriu funsionáriu sira nian, selu empresas sira, halo transferensia ba idozus, veteranus, bolseirus, nst.

Benefisius ba Estadu ho sistema automatizadu ida ne'e lubuk ida. Ida mak simplifika fluksu serbisu nian no elimina intervensaun manual. Benefisiu ida fali mak aumentu iha efisiensia iha prosesu pagamentu. Sistema ne'e seguru no kredível.

Karik iha erru ruma wainhira hakerek numeru konta bankáriu benefisiáriu ruma, maka bele deteta kedas no koriji erru ne'e molok halo pagamentu. Hanesan temi tiha ona, benefisiu klaru mak pagamentus sira ne'e akontese iha tempu badak (*real time*). Benefisiu tuir mai mak Tezouru Estadu no entidade Estadu sira bele ona monitoriza sira ida-idak nia balansu atu nune'e bele halo jestaun di'ak liu tan ho likidez ne'ebé iha. Ikus liu, benefisiu husi automatizasaun ne'e mak halais ezekusaun orsamental no movimentu osan iha rai laran bele estimula kresimentu ekonómiku.

Laos deit Estadu mak hetan benefisiu. Sidadaun sira mós sei hetan benefisiu liu husi sira nian kontribuisaun rasik nu'udar sidadaun ida. Ho facilidade automatizasaun ida ne'e shabelar liu tan seitor finanseiru ba segmentu sociedade ne'ebe ladauk hetan servisus bankarius. Ne'e mak ita hanaran inklusaun finanseiru. Ho *National Switch*, ne'ebé la kleur tan Banku Sentral sei lansa, comunidade sira bele hahú kumpre ona sira nian obrigasoes ho Estadu.

Ministériu Planu no Finansas sei buka serbisu hamutuk ho Banku Sentral atu kontinua aumenta reseitas laós-minarai liu husi dezenvolve interligasaun entre sistema alfandega no impostu. Iha area impostu, liuliu ho introdusaun IVA (*imposto valor acrescentado*), signifika katak movimentu osan sei makas tebes, no kontrolu sei sai dezafiu ida ba administrasaun fiskal. Ho interligasaun automatizadu ne'e, maka ita sei halo kalkulu obrigasoes fiskais ne'e sei sai facil no transparente liu. Kontribuinte sira sei la presija hambrik iha fila naruk hodi selu sira nia taxas ka impostu ka atu halo pagamentu ruma. Nune'e, kobransa impostu ka taxas husi empreza sira sei sa'e makas no ema barak tan mak sei kumpre lei.

Hein katak kestaun internet bele rezolve la kleur tan atu nune'e interligasaun automatizada ida ne'e bele lao ho di'ak, laós deit iha kapital Dili maibe mós iha munisipius sira.

Atu remata, ha'u hakarak dala ida tan hatoo ha'u nia agradesimentu wa'in ba funsionáriu sira ne'ebé involve iha prosesu preparasaun ba serimónia lansamentu ida ne'e. Mai ita serbisu hamutuk atu ku'u benefisiu husi interligasaun sistema rua ne'e.

Obrigadu.